



Ioannes natus est ex familia nobili Stœrorū in Alsatia, anno circiter 1500. Is cum literarum rudimenta didicisset, pietatis amore Murbacense monasterium accessit, & Benedictinorum ordinē suscepit. Coenobiū illud in superiori Alsatia ad Montana Vosagi situm ex potentissimis Germanie monasterijs unum existit, quorum quatuor abbates, singulari prærogatiua & dignitate, cæteris abbatis bus præferuntur, sacri Romani Imperij abbates habentur, omnibusq; Imperij causis interesse solent. Fundatum autem legitur circiter 724 annum ad S. Episcopi Pyrminij petitionem, ab Eberhardo duce quodam Sueviæ, qui in arce Alsatiæ Egysheim habitauit, & tandem sub Theodorico Francorum rege in suo monasterio ordinem suscepit. Dictum id erat Mürbachium uel Mortuuegium à latrocinijs tum infesto loco, quod antiquitus Peregrinorum Viuarium diceretur. Sunt tamen qui hanc fundationem Ethiconi filio Leodosij attribuant. In eo ergo loco cum Ioannes Rhodolphus uitæ integritate & rerum usu conspicuus esset, communis fratrum suffragio Murbacensis abbas electus est.